



顧文康公文草目錄卷之六

墓表

明故嘉議大夫都察院右副都御史雙溪



先生杭公墓表

明故中奉大夫雲南布政使司左布政使

南陸先生楊公墓表

明故河南布政司右叅政進階嘉議大夫

吳公墓表

明故贈奉直大夫戶部山西司署郎中事

員外郎李公墓表

明故大中大夫江西布政司左叅政耿公

墓表

明故贈戶部貴州司郎中范公墓表

明故贈承德郎戶部主事劉公墓表

明故誥贈張宜人徐氏墓表

福建泉州府同知北莊梁先生墓表

墓表

顧文康公文草卷之六

東吳顧鼎臣九和著

墓表

明故嘉議大夫都察院右副都御史雙溪

先生杭公墓表

公姓杭氏諱淮字東卿別號雙溪其先中州人

姓亢氏系出漢太山都尉徐子孫避亂居杭遂

以地為氏公之遠祖某自杭徙義興之東霞埠

高祖宗三又徙百瀆遂定居焉曾祖諱邦愷祖

徵考倫號省齋世樂隱省齋讀書能詩娶王氏  
生丈夫子六人長濟福建布政司右布政使公  
其仲也濟初仕爲吏部稽勳司主事省齋得封  
如其官母王氏贈太安人公少誠篤勤敏受經  
于兄勤學成痞疾及遊黌舍與兄齊名嘗臺試  
兄居首次之時稱二難弘治乙卯領鄉薦乙  
未登進士第初官刑部歷山西廣西二司主事  
負外郎詳讞明慎具獄辭如老吏同僚某主事  
輪宿部中督察獄禁責重且久以子病疹劇辭

不得公慨然代之公暇會同志講經義資以立  
身行政慮淮陽諸郡重囚多所平反陞浙江按  
察司僉事廉靖不苛楮戶輸歲課公當簡擇可  
否衆循常例括金以獻公斥去之嘗謁林和靖  
祠墓一覽廢興慨出俸金葺之并建放鶴亭手  
書弔處士辭刻于石尋陞本司副使清理戎籍  
隱匿宿弊搜剔殆盡正德庚午捧表賀萬壽節  
回渡江夢驚心動馳歸省侍省齋已遘疾不五  
日而没人以爲孝誠所感服闋復除山東按察

司副使整飭天津兵備銓司念公有文行改雲南督學赴任道經貴陽清平衛蠻虜突至圍其城守將畏衄束手問計公徐爲區畫令諭以禍福遂解散公至雲南端楷範嚴條約文尚醇雅士習爲變秋祀黔寧昭靖王制以布政使主祀三司官咸與旣而其家廟舉祀如歲例速陪衆欲徃公不可曰昨命祀也當陪今彼舉私家禮陪非宜衆從之國初雲南未定王禕吳雲前後死節公乃倡爲二忠祠請列祀典考績奏最陞

湖廣按察司按察使屬有怙勢以賄敗者衆爲請公皆弗聽竟寘之於法御史疏薦公執憲不撓可大用巡撫臺廉捕事曖昧百人杖瀕歿下之獄公惻然曰豈盡得其情邪徐訊之多得釋陞山東右布政使尋轉河南左布政使時帑羨二萬餘緡守吏間以啖公公笑曰此它日福吏之貲也陞南京太僕寺卿修舉馬政暇則吟咏山水滁人比之六一翁進擢都察院右副都御史奉勅督理南京糧儲公務持大體舉要務而

當道者方事苛細謂公長於文學短於吏事勒  
回籍聽用公浩然買舟下荆溪返舊廬日與兄  
弟親舊吟咏登眺澹然無復外慕兩京科道交  
章論薦謂公古心古行時論攸歸投閒非宜銓  
曹六上疏推任卿貳皆不果用公天性孝友持  
身廉介而沖淡清逸胸次洒然平生喜施宗黨  
貧乏歲給之粟不能斂葬嫁娶者賙之有常數  
立宗約月一會宗人諭使敦行禮義有過者戒  
訓令改育從姪遺孤女令獲所歸它姪鞠異姓

子以亂宗言于官斥逐之家居未嘗輒通刺公  
府宗姻有誑誤非辜者輒爲申理鄉人持不平  
詣公求直一言決斷無不愧服平生書無不讀  
文章步驟西漢詩宗杜少陵書法顏魯公所著  
有雙溪集藏于家嘉靖十七年戊戌九月八日  
卒其生寔天順六年正月十有四日享年七十  
有七公配潘氏封安人子一奎浙江布政司都  
事女一適徐文炤孫四士鎔邑庠生次士銘餘  
幼公卒之明年奎具疏以卹典爲請下儀曹議

謂公雖三品未滿一考然以名碩需用法得全典

上可之特賜諭祭大葬蓋異數也先是奎奉其鄉先達太子太保南京兵部尚書鳳山秦公所撰狀謁予于京邸徵文表公墓予雅重公且知秦公之言非誣乃爲之叙述如左於乎公名德懿行政績屹然爲時所忌弗究厥用君子惋惜焉然迹其所自立固足以震耀海內垂之永久弗泯泯矣後之論世考德者尚有徵於斯文公

明故中奉大夫雲南布政使司左布政使南陸先生楊公墓表

河南靈寶楊氏系出漢太尉震後靈寶即古弘農郡也公諱惟康字叔安別號南陸高祖考諱克明國初以薦舉起家官至都察院左都御史曾祖考春弗仕祖考懋被詔恩錫高年衣冠服考某登某年進士第歷某處知縣用簡擢爲南道監察御史贈承德郎刑部山西司主事妣張氏封太安人先生生而有異資藝成試外臺占

優等補邑學生負弘治乙卯鄉舉第六人已未  
舉進士丁外艱服闋甲子選授刑部山西司主  
事時烏程閔公平湖屠公相繼爲尚書知公究  
心于法理屬看詳諸司章奏正德初逆瑾擅威  
權添設內刑廠西廠數起大獄人情洶洶公陰  
爲救解脫人於死甚多歷陞署員外郎郎中未  
幾選浙江按察司僉事豪右聞先聲懾不敢動  
杭富民王氏襁褓兒四五皆倩人代援例爲國  
子生事覺百方求以賂免公悉正以法辛未遷

四川按察司副使領勅整飭建昌兵備至則修  
復戍堡二十餘所創法申令禁民勿與諸夷交  
易夷情大窘遂歸虜掠受約束不復爲患分守  
太監宋某怙巨璫勢大肆貪暴公一裁以正擒  
其左右助惡者遣戍遠地救恤軍民疾苦不遑  
寧處建昌人恃爲父母威茂水下民兵作亂圍  
城撫按謂茲事非某不可辦會調公威茂兵備  
公至下令曰脅從者投牒自別乃得首惡四十  
餘人誅之餘悉置不問一境獲安西路疊溪防



守廢弛如建昌公使人廉賊首悉擒之道旣通  
乃繕堡堞修儲爲經久計上司旌其功曰廉介  
風采軍民素所信服謀猷果敢羌夷莫敢縱橫  
丙子擢陝西按察司按察使時鎮守太監廖某  
侵理軍民詞訟氣焰逼人族子鵬居中用事寔  
濟其奸惡雅敬憚公卒不敢干犯指揮邢仁假  
璫威以捕盜爲名誣執平民榜掠歿者十餘人  
繫老稚百餘身無完膚巡按御史檄公慮之悉  
爲辨雪邢懼投井歿陝一士夫挾私怨囑巡撫  
御史曹君珪劾公曹至陝得其情顧薦之曰分  
巡浙中暮夜却百金之餽掌憲陝右公庭惟一  
鶴之隨公以歛謫而形迹不存明以理獄而輕  
重咸得蓋潛申理其事云嘉靖辛巳擢山西右  
布政使尋轉左布政使處置宣大三關糧芻并  
宗室祿米章程粲然後人皆守而行之癸未調  
貴州時湖貴川三省會兵勦芒部叛夷公轉餉  
未嘗缺乏賊平朝廷特賜銀幣以酬其勞甲申  
調雲南左布政使尋丁內艱起服當道交章薦

公可大用公見時事拂意遂幡然歸寄情於觴詠世故不復經慮公詩文清逸溫厚所著有南陸橐藏于家癸巳某月日遘痰疾卒享年五十有九配許氏太保吏部尚書襄毅公長女封安人子男四曰守曰宋俱縣學生累舉於鄉不偶曰宥曰宇皆美丈夫四兄弟先後先生卒女四端容適商州學生南源肅容適潼關衛指揮姚勝祖嘉容適同邑監生焦詔恩升容適武功縣學生康栗栗死亦仰藥死有司以聞詔旌其烈

公既歛宗族合議立兄子宏爲後公之葬在某年月日墓在縣城南南坡之原宏奉從父詩狀請於鼎臣表公墓詩領戊子鄉薦名士也其言可徵爲之論著曰壽考子孫人之所願欲莫大於是考古詩人凡頌禱於其所厚必先於斯二者驗諸造化因人之善惡禍福之亦不外是公爲理官久每當矜疑多所輕宥歷諸省藩臬馭羌夷芟暴亂從軍旅轉輸之役動中機宜累著勛績然未嘗輕債一事妄殺一人其立心制行

舉足爲人法式而使之四子俱歿年不滿六十於乎天道尚可謂有知乎爲善者果足恃乎惟公考其平生果無愧怍而勛名將垂諸不朽是所得於造化者不薄而足以自慰矣

明故河南布政司右叅政進階嘉議大夫  
吳公墓表

公姓吳氏諱愈字惟謙世家崑之積善鄉曾大父子才大父公式贈刑部主事父凱歷刑禮二部主事平生持正不渝棄官養母以終旣沒鄉

人私謚曰貞孝先生適母沈氏母陳氏俱贈安人陳以公貴也貞孝公初未育子贅先詹事府君爲婿吾適母寔公伯姊公於舅甥之愛越庸也嘉靖壬午歸展先墓二姓尊行惟公靡然康彊無恙每因以興如存之感甲申冬十月公忽遘痰疾旣時止作起居飲食不廢暨師曰罔害越丙戌夏五月十有九日竟卒春秋八十有四先是公之子東等以翰林院編修王同祖所撰狀徵文表墓道鼎臣內隱之餘秉翰輒廢

又二年始克爲之叙述曰公天性敏慧髫年已  
露才美迨補縣庠生聲華籍甚成化戊子領應  
天鄉薦乙未登進士第觀政兵部尚書俞公器  
之將言於吏部以職方處公公聞之托所知謝  
曰不知者謂某競也官有定分且事出人爲將  
有怨悔乃已未幾職方司屬悉坐註誤外補人  
服公卓識戊戌除南京刑部廣東司主事讞鞫  
務得隱情暇繙閱舊牘久之遂精於法理己亥  
丁內艱服闋刑部尚書張公瑄聞之移書吏部

欲得公甲辰復除舊官弘治戊申陞雲南司署  
郎中事主事侍郎阮公勤特奏調公仍守舊司  
部有大獄咸倚以決章奏必經詳定乃上酬應  
劬午至忘寢食辛亥詔兩京大臣舉屬可大任  
者尚書鄭公時薦公心術端謹才行超卓堪長  
外臺不報居亡何擢知四川叙州府時論不平  
公曰領郡重寄也苟可以宣吾力吾何擇焉叙  
古楚國公因其土俗先後之以禮法獎進文學  
親爲課率自是人才輩興獷悍之風漸熄慶符

盜劫縣治捕二十七人煨煉誣服公慮得二人嘗爲盜者餘悉釋之後竟獲真盜馬湖府土官知府安鰲淫虐不道事聞上命繫治撫按憲臣以委公公曰當以計擒之上官主用兵議卒無功公選徒會糧若將大舉鰲懼而逸謀煽諸夷爲亂公曰無能爲矣乃縱一二輕囚令自効贖罪爲嚮導數勁卒尾之不洽旬鰲就擒事竣賞則不逮公不以介也馬湖置流官匪人撫馭失宜羣夷跳梁至攘府印去當道復彊公行公至

開以禍福夷悟裹印獻當道勞公曰賢守以口舌代斧鉞成此偉績貴州用兵轉餉險遠公區畫周悉民不知艱賊平蒙寶鏹文綺之賜長珙二縣民飢繼以疫賑哺有方且敎令事鑿藥變祠鬼俗全活十餘萬人叙建藩府議遷民三百餘家於江外公不可曰邦與衆守遷民非計乃度近地居民且量給徙費民權如歸在郡九年凡便利於公私罔不殫慮爲之治狀不暇縷數用交薦擢河南布政司右參政督全省賦兼理

屯政吏胥緣會計爲奸弊蠹糾結公至剗剔殆盡宗藩占隱屯田

上特命官覈之持久不決公徐折以數言府寮語塞遂止其半時巡撫都御史孫公需雅知公將舉以自代會改陝西不果公所積累久而彌光人以公輔期之蜀士劉武臣者挾私望飛不根語吏部信之公曰命可知已弗辨遂得致仕後用詔恩進階嘉議大夫公彊毅英發識達大體翼翼奉公律已甚嚴居官三十餘年常祿之

外絲毫不苟事人所難力任而優爲之自任自信不能轉流要結以爲地故宦迹遲回屯膏用惻歸號曰遜菴以見志延師教子孫結耆舊爲文會觴詠輒盡日負宅田數十畝課奴耕歛觀以自適年齡旣高神志不衰陳言往事談歷歷如指諸掌縣官就質所疑里後生有所咨請爲陳典則計是非利害退皆充然居家嚴肅恪守貞孝公軌範配夏氏封安人太常卿夏公景女莊懿慈惠內政有賴焉貳室姚氏趙氏子男四

長東浦江縣縣丞次南國子生公仲第德無嗣  
推以爲後次西次守中國子生女五長贅贈翰  
林院編修王銀同祖其子也次適進士贈大理  
寺評事陸伸次適翰林院待詔文徵明次適陸  
燦次適朱希韓次尚幼孫男四詩國子生訪許  
誌女五曾孫男三女三夫臧孫氏不忘諫君違  
一事之忠君子美之曰其有後于公爲縣獄吏  
自謂治獄多陰德未嘗有所冤子孫必有興者  
如公勤勞於公始終一節夙夜匪懈矧所平反  
賑發活民命以萬計今子孫多才必將食其報  
焉後有考德於是乎徵之

明故贈奉直大夫戶部山西司署郎中事  
貞外郎李公墓表

公姓李氏諱榮字遇春其先爲開封府之封丘  
縣馬臺村人曾祖考二公丁元季亂偕伯兄大  
公避兵走通許叔第三公走河間季第四公走  
山西後叔季遂不通問無所於考焉國朝洪武  
初詔天下遷民隨在占籍大公謀於二公曰先

壟無主我長當返汝留此二公遂定居焉相宅於縣西十八里地名九女塚剪荆棘芟艸萊成田數十頃未幾以材力儲蓄雄諸遷者二公生奉先奉先生循配某氏公考妣也公爲童穉時已穎異常兒雖居田埜彬彬有士人風長補庠生時學官尚知教士條約嚴肅公遵之終始不逾勤學彊記善引進後生里中顯者多其所成就天順中充歲貢卒業國學四方名士多納交焉曹欽挾近閩曹吉祥內應乘夜爲亂同舍皆

戰慄垂泣公曰鼠輩負大造恩比明成擒耳何懼已而人服公識度歷事刑部日繙閱舊牘遇擬議明允有體要者錄得數帙以歸因是遂習吏事待選家食僻處村舍力田教子每遇佳辰則徜徉林壑或招邀親朋吟賞酣暢累日乃罷性不喜攀附權利人自樂於親就縣令之賢者常往來咨詢謀議甚密人有干犯忍之久而自平未嘗一訟于官成化辛卯選授淮府典寶副人皆曰官冷若是柰何公曰吾性不能俯仰承



奉上官職是固甚宜抵任僦屋以居挾資以給家人不免於怨嗟而公泰然也久之以職事見王歎曰似爾村貌殆不止於府寮屬也自是多被任使公亦孜孜奉公集事而致言不至同列意氣相得者與乂彌篤真有昆弟之誼居間勸率子弟進學燕會不用聲伎集諸生試經義對句等第優劣以為樂公出仕十五年年七十有二以成化乙巳三月十五日得疾卒于官王甚傷悼之遣官致祭時公未有壯子不能扶榇以

還遂以某年月日卜葬于某府縣某山之陽公生平峭直不能苟容交游雖至親厚有過即面折之分別是非曲直義形于色宗黨若鄉閭有所爭競往往取決即帖服無後言好施予樂餽遺在縣庠國學時每與師友通財不謀生產人勸之則曰吾既不為官冷自憂寧復能為貧憂子孫哉盖心知其後有昌者矣公卒後以子志學貴贈奉直大夫戶部山西司署郎中事負外郎配潘氏蚤卒生一子曰俊女二繼配張氏贈

宜八有懿性生二子曰仁其一即志學登正德  
戊辰進士選入翰林院爲庶吉士進業有雋聲  
授兵部主事歷遷浙江衢州府知府心志開通  
材猷敏贍嘗當紛值險談笑幹濟爲流輩所推  
然亦以嫉惡泰甚不能阿上官意動得謫毀宦  
迹遲回女三孫男四曰鸞曰鳳曰蔓曰夢女四  
曾孫男二曰綍曰經女一玄孫男三正德庚辰  
志學以公事至京奉某狀請表公之墓曰先人  
之體鳧托遠將遣子姓一人往家于墓側以奉  
春秋非得先生文無以發先德且茲後人意甚  
愾懇遂爲之序述云爾夫古者民有定志是以  
朝無幸位而野無媮俗後世禮教不興而庶民  
之志荒矣望欲日熾而僥倖恣睢之徒衆矣若  
公高材質行何施不可僅沾宗藩一命乃不啻  
無怨愠蕭然吏隱以終其身益累德究業以責  
報于子孫可不謂迥識達士矣乎俾世之仕者  
人人然而治功有不逮于古吾不信已

明故大中大夫江西布政司左參政耿公

墓表

正德戊辰邂逅監察御史耿公于京師一見如舊知儻居密邇日入聚處情好彌固蓋公於吾兄子潛爲同年又同官於吾氣性若相類者故投契無間如此越及酉冬起服過東昌則公已致仕家居相見道徃甚懽獨怪其色黯慘有不懌者察之知其閔世嫉邪之志未平也至丁丑某月日竟以疾卒得年五十有五於乎其可悼也夫公諱明字晦之別號一白世爲館陶縣人

高祖勝剛在勝國隱於農畝曾祖遠入國朝以閩左補隸平山衛籓遂居東昌郡城祖貴由國子生爲北城兵馬副指揮父耀以公貴封文林郎貴州道監察御史母宋氏贈孺人公少即警拔不群有雋聲於黌舍成化丙午領鄉薦正德丙辰登進士第選授貴州道監察御史時先皇方屈意受言公侃侃論列無所顧忌貌偉色嚴庸人鄙夫望而畏憚之奉命巡北城巡內庫印烙南畿馬匹所在懋著風采出按雲南去

貪猾旌賢能剗弊與便號得憲體監臨鄉試簡防嚴密取士惟公嘗慮歿囚有民家子爲妖巫魘魅歿而復甦泣謂父母曰某巫拘我置一罌中緘以紙幸紙上有隙得逸以歸事覺論死每當刑有司謂謀殺人未果可矜也得緩死數年公奮然曰此輩挾妖術殺人視盜白日殺人情惡尤重深又安知其從前不曾殺幾人乎宥之非當遂斬首於市遠近稱快滿兩考績望迥出時輩論者謂如公當使久在朝著必有裨益會

逆瑾竊柄惡謗士欲害公無可指摘乃出爲浙江湖州府知府湖地下歲潦民大飢公設法賑哺之全活甚衆修葺學較先于它務別建書院聚諸生之穎異者命烏程學訓陸槐教之公暇時臨視考較多所成就馭吏嚴無敢爲姦一郡稱治上官舉其才可大用擢江西布政使司左參政旣去湖士民如失父母師保江西方用兵勦羣盜公專督芻餉而時以謀議贊佐軍務總制都御史陳某疏薦其賢賊平幕府例有賞

給一切不受曰吾職也奚以功爲未幾得寒濕疾慮妨廢政務再疏乞休既歸即居第後構書屋幾楹日杜門披覽其中教諸子習舊業雖親知亦罕交接何況郡縣吏士論益以此重之君配李氏封孺人子男二長僉國子生次翁女二孫女一僉以卒之年八月十七日卜葬公于祖塋之東南持翰林院編修許君成名狀來請曰先人臨終命不肖孤願得先生文表于墓其幸念平生惠賜一言乃序述系行而爲之論曰正

人直道不容于世自古以然君子求其在我者而已公夙抱材器感遭遇以功業自期行未中路而事日非矣抗志負氣不更舊轍動有齟齬遂尼而不前皆天也天之畀美矣用不用永不永達者弗計焉爲公之後人者其毋踰矩範哉

明故贈戶部貴州司郎中范公墓表

公姓范氏諱畬字耘夫別號良沙主人世家揚之寶應爲邑四大姓之一世以敦樸嗜義著稱祖考盛考禮妣某氏公自幼警敏善計讀書即

領會大義人曰必非常兒厥考念其體羸事佔  
俾爲難強使治賈公嘆曰吾即賈疇當亢范宗  
者遂遷志單慮絜羸縮籌出入冥與機會久之  
殖貨拓產作室廬製器用積累數倍於先世人  
咸稱之曰良賈哉公曰吾聞古人捐私財助公  
家顯名於史冊吾生無益於時即多貲何爲會  
歲飢乃出粟若干石輸官給貧民遂以例授冠  
帶然非公志也乃召諸子勗之曰吾雖不能以  
貲顯若古人吾子孫當發世善佐國家以文顯

斯閱而遠爾是必在韶教督之甚力韶亦自奮  
務畢公志蚤歲名聲大起弘治辛酉領應天鄉  
書占高第公得喜曰兒固亢吾宗矣居亡何長  
子新配才相繼遘疾以沒公年漸高日愀然不  
怡韶侍養弗去左右公強之往會省試凡六往  
往輒不售歸而居公察其意怒曰吾年且八十  
兒不出仕何爲韶矍然起謁選於吏部試藝第  
一授禮部司務每以私情訴於其長憐之三銜  
使命輒得過家侍公且乞諸名公詩文爲壽張

樂侈燕速諸親舊相與樂公郡邑榮之蓋依依不能去公念曰兒謂我耄而衰爾今知吾未衰也每食爲加一殮拜起麾掖持者出入却杖行步如常韶大喜慰辭去後二年遷戶部員外郎監通州倉糧忽夕夢有異旦日亟馳詣尚書所言其情甚迫切尚書許其領公事以南得便歸至則公已病猶強起曰吾固知兒必來居月餘竟卒寔嘉靖戊子夏五月之二十有八日其生正統辛酉秋七月之十有九日享年八十有八

韶旣免喪還朝用年勞遷戶部貴州司郎中癸巳考績奏最制贈公如其官配刁氏爲宜人於是鄉閭嘖嘖稱歎曰良沙主人可謂有子知含笑於九京矣公爲人倜儻質直孝友成於天性事父母承顏養志執喪營葬皆合於禮度兄弟異居悉推貲產與之後有破產者輒復周給與人重然諾好施予識達世務有所猷爲咸中慮以故邑之縉紳縫掖暨閭閻長老子弟亡弗敬重公者歲鄉飲酒禮居賓席累蒙詔恩受高

年粟帛卒之日沐浴正衣冠遺諸子孫訓皆善言條然而逝子男四長即新次翊次韶官至浙江布政司參議次欽崇府典膳女一孫男六嘉謨嘉禎嘉議嘉祉嘉兆嘉愛議祉並縣學生女十二曾孫男五女六韶來京師一日持表第朱君應辰所述狀拜請表公之墓韶於朝臣鄉同年遊胄監同舍仕同朝稔聞厥考之懿行又朱君爲邑彥言益詳可信乃爲之序而論著曰古者四民有專業然自殷周以還士不遇而逃於

農賈者衆矣於乎果士也奚往而不可哉後世習俗日卑士乃有都高位享厚祿猶澠涇乾沒孳孳牙儈屠沽之爲者是故問其業則士也考其志與行則賈也奚庸爲士問其業則賈也考其志與行則士也奚病於爲賈戶部公所成就如是八尚可以賈少之哉矧叅議君溫雅恭謹濟厥美而子姓又多負奇氣抱秀資他日聯翩而起策勛於皇朝詩禮之風衣冠門閥之觀甲於江淮者必范氏矣後之君子論世考德必將



徵於斯文

明故贈承德郎戶部主事劉公墓表

公姓劉氏諱汝楫字濟之其先薊之遵化縣人也勝國時衣冠舊家高祖考諱進卿曾祖考景山祖考汝明經爲歲貢士卒業國學授陝西洛南縣學訓導考清領景泰癸酉順天鄉薦累舉進士不偶仕爲山東平度州知州有惠政改山西之遼州致仕妣周氏公娶王氏爲山西布政司參議昭之女生子男三長炯然邑庠生先卒

次燦然次燁然登正德丁丑進士第授戶部主事晉員外郎孫男幾女幾公幼穎異讀書日記數千言厥考嘗與友人論究隱義公從旁應曰此出某書考驚曰家中無此書汝何自得之曰偶閱之書肆中耳大奇之爲文甚敏且煨煉字句務於精確見者嘖嘖稱賞謂取第可芥拾後乃爲家務所奪然綜理隙暇不廢展閱羣書百家下逮牛馬鑿方瑣細之策無不涉獵掇其粹要以爲淑身治生之資鄉黨後生多從質疑厥

考居遼三年過於勤瘁得風疾即勸令解官寮  
案沮之公戚然曰人多願其大人居官徒冀厚  
積俸貲爲身計耳吾弗忍也即列狀上官得致  
仕以歸第汝梅少不羈約就繩簡學成從遊者  
累千餘人命不永人痛惜之晚課二子耕讀因  
自號耕讀樂叟已而歎曰耕者不歲讀者不顯  
吾方偃蹇於其上何所樂姑以寄吾身而無所  
願於世更曰退叟又題壁曰世科誰不繼得慰  
二親難皆以激勵其子使成業耳後燁然第進

士例得歸省公時已臥疾然甚喜一日召至榻  
前戒之曰爾祖劬書四十餘年所未得者爾一  
旦得之尚知所愛惜哉又曰思其難則知愛知  
愛則思所以報君父矣至是年十月二十一日  
竟卒以十二月二十一日葬於邑西城祖塋蓋  
正德十二年也嘉靖改元奉詔恩追贈承德郎  
戶部浙江司主事公性恬澹而意氣高邁不侈  
服食不置妾媵不親市井足跡不涉公門晚偕  
高年朋舊結鄉社月一燕集盟真率而務儉約

生平重義忍事里中窶家婚喪不能舉捐貲助之稱貸無以償者聚券焚之嘗行道拾遺金徒倚良久不去忽一婦來甚倉皇問之遺主也出而還之又嘗見二婦女前行甚亟遺物一裹呼使收之乃新婦歸寧以來製帛履奉尊章者感謝而去鄰田侵界畔家人來言公曰彼所侵能幾何勿與較也公善騎射且能詩率口成章深厚平實一時輩類不能及也戶部君爲鼎臣丙子京闈所取士初覲喜其謹重謙抑無疾言無惰容曰必有所本而然今年吾引疾家居適君來督權於吳之滄墅關公事留滯馳狀請表公墓乃知公之賢所以迪其子者深矣遂爲之論著曰古稱燕趙多感慨悲歌之士考其所爲似強人意然不合於中行者多矣如公質行遠識文雅可觀詎非生長於畿輔漸被於治化者特沃乎以是光前修啟後圖世澤滋未艾也後有作者於吾文乎取徵

明故誥贈張宜人徐氏墓表

嘉靖乙酉閏十二月七日前奉訓大夫祁州知州張先生安甫墓其配徐夫人于橫塘先塋之左越七載辛卯其子刑部員外郎寰考績于朝推恩封先生如其官贈夫人爲宜人且得予告歸養於是先生馳書抵鼎臣曰安甫濫叨科第嘗承乏守州夙夜兢惕獲免罪戾寔亡妻內助之益居多旣而乞身早休錫命未霑茲幸以寰兒備員郎署蒙受追贈真足以慰諸泉壤矣顧墓道之石尚闕其辭敢徵一言用表遺德乃爲

叙曰徐張皆吾崑舊族宜人考諱明別號澹菴舉經明行修授會稽縣學訓導遷長垣長壽教諭致仕妣盛氏宜人自幼靜重不嗜紛華父母愛之願爲得佳媳祁州考諱稹號繼畊於澹菴世通交戚祁州夙敏慧秀翹穎脫子女之良二姓交慕遂締姻盟繼畊翁踈宕好義室金氏亦慈緩畧於治生宜人來歸職優主饋材類克家爲翁所器重遂攝家政承尊馭卑惟勤惟儉業底豐裕繼畊會群從賓友不時戒須宜人躬自

治具應靡遺後祁州習舉子宜人率婢子紡績以供膳或值燕遊無益則膳而不羞默寓警戒勸相之意繼畊翁晚得痰疾起居湯藥將奉不解者數年沒而歛藏之事致其誠信祁州時自南宮聞訃奔歸泣且謝曰俾我無遺憾緊汝是賴後事姑金於宦邸尤盡孝養祁州釋內艱從容引退闢園鑿池栽花竹果蔬日徜徉其間宜人略無榮慕梗沮客至猶躬佐具不以衰老辭于寰童卅時已負奇氣騰雋聲宜人衷愛之然

隨時俗偶一爲博戲事輒厲色辭訓戒甚切學成舉于鄉乃喜旣而會試數不偶則譬解之曰尚未及汝父登第之年何戚戚也但努力進學耳正德辛巳成進士假使便歸省則大喜未幾勉之行曰汝身在公勿戀戀顧家爲寰竣事還京授濟寧州知州宜人就祿養朝夕見子勞於將迎愀然不怡寰慮貽親憂上疏陳情乞恩便養得改濮州濮地非要衝至則安焉居無何婦王歿于產宜人悲傷之種種弗釋往歲曾遭風

疾至是作尋愈明年秋七月復作遂卒寔乙酉  
八月二日也享年七十有三宜人至性遠識念  
澹菴年耄雖遠宦歲遣媪問安否家居饋養無  
虛日每時祭思所生必泫然下涕以義設奠焉  
姊適周孀居妹適浦先卒惠其窮恤其後不令  
失所祁州從弟大理寺正申甫壯歲貧無聊來  
受學祁州歲給粟贍之死于官蔭鞠其孤皆宜  
人成之年未五十而棺衾衣履之制罔不周備  
或以爲訝則曰故人所不免奄忽盡期猝辦爲

難及親黨歿而告之者隨所責推以與之子年  
近四十未抱孫乃戒婦曰吾不聽汝翁蓄婢妾  
今汝夫子然至今以爲悔汝勿效我爲適庶皆  
子也婦聽之不四年生四男宜人自奉甚薄與  
下人同甘苦疏食布衣貴而弗厭以終其身有  
古賢女之風焉子男一即褻詳慎謙退抑抑如  
弗勝而臨民戢盜乃赫然焯異績及官法比惟  
明惟慎懋著勞效以顯親揚名可謂不負母教  
矣今雖辭榮歸養他日致遠無難也女一孫男

四恒慕恒純恒思恒學孫女二君子曰婦者家之所繇盛衰又曰世多謹於擇壻而忽於擇婦壻易知而婦難知所繫甚重其可忽哉鼎臣髫年嘗侍澹菴於几杖間簡厚寬和望之知爲長者後偕其子蘄同游學舍尤端謹自好稱其家風於乎宜人之賢厥有所本也表宜人之墓而著其父兄詔來者以擇婦之道焉爾世有苟慕一時富貴而不論其人何如徒挾勢規利于目前謂計之得而不知家世之澤已斬于此於乎

可鑒哉

明故福建泉州府同知進階朝列大夫北

莊梁先生墓表

梁氏其先河南人在元季有諱孔璋者爲重慶府同知子仲德桂陽府通判始家蘇之崑山子澤民婺州路經歷入國朝婺州之子國用爲山西大谷縣主簿子鏞四川萬縣主簿子棟不仕棟子昱山西平定州知州平定公有文行以孝稱于鄉先生之父也先生生于正統八年五月

二十二日幼而孤鞠于祖母張母吳既長通經術修行簡晦顯不渝故崑之數世宦世德者必先梁氏焉先生諱統字尚素晚號北莊為庠生時與故監察御史朱先生棫今致仕南京兵部侍郎王先生倬輩篤交戚為文會于經傳子史講究辨難斤斤致極底裏暑寒不怠其所詣蓄宏邃以達遂領成化辛卯鄉薦屢不偶於春官以母老就選得授江西之德興縣學訓導勤于造士士彬彬起兩聘典鄉闈試事號得人三考

以最陞福建漳州府通判職科稅不亟不緩所至諭民以供正之義事辦而民不困屬縣巨賊負險固恃強弩毒矢流劫無顧忌上官以勦捕委諸先生乃練土兵立營寨令軍中紉布如被狀為攻守扞禦計遇賊矢著布輒墮地士以無恐遂奮擊殲賊魁俘餘孽直擣巢穴凡脇從皆生之後有土豪連流賊害人復勦滅之民大安上官以廉能薦于朝得膺寵命平定公進階奉直大夫母吳封太宜人室周繼陳贈封皆安人



先生隨陞泉州府同知漳民立石表遺愛焉至  
泉未幾署府印適中官至稱上命科索青布非  
賦額也先生委曲謹處不貽民患郡田疆界舊  
多侵併爲一正之強弱皆便居二年未六十  
乞致仕歸日與鄉士大夫宴樂文酒闢園池亭  
榭以自娛閒居遊適無拘于固無流于弛有古  
良士之風以正德十年十二月初三日卒享年  
七十有三後二年九月二十九日卜葬于小虞  
浦之元符字圩新阡子男七人鳴鳳四川馬湖

府推官鳴鶴國子生周安人出鳴鸞鳴鵬俱庠  
生陳安人出鳴鷗天鳴鷗鳴鵬俱側室金出孫  
男七人金會介愈全弁僉金介庠生孫女十人  
適吳懷周志金夏顧大有顧履方顧鈞幼者許  
嫁朱光璧周仲詩張廷相嚴恭曾孫男二女二  
先生儀觀魁岸性氣質直持已臨物兢兢畏顧  
名義老而喪親猶哀傷過禮教子孫正而不瀆  
處兄弟群從雖疏遠篤以恩義無所歸者收養  
之死而埋藏之交際無貴賤雅飭溫易其有不

可正色抗言面斥之人亦不以爲忤子孫娶婦生子聚處無下二十餘人家庭雍穆不聞有異言嗚呼若先生可以爲鄉閭表則矣某于先生托先後輩又婚姻家知其賢特詳素心敬重之其沒也吊哭會葬不得如禮恒以爲歉適其子鳴鳳謁選來京師請表先生之墓遂爲之撰述俾歸而刻諸石先生雖世有顯者職多牧貳未稱厥美今諸子孫咸有抱負將大發先生之名蹟不翅闇昧若是後有考德者于是乎徵焉

顧文康公文草目錄卷之七

誌銘

贈奉訓大夫翰林院侍讀學士張公暨配

封太宜人劉氏合葬墓誌銘

奉議大夫戶部郎中芮君墓誌銘

勅封承德郎刑部主事張公墓誌銘

敬齋先生墓誌銘

盛汝成妻沈碩人墓誌銘

朱文靖妻錢氏墓誌銘

泉州府同知朝列大夫梁公繼室陳安人  
墓誌銘

文林郎德安府推官在竹梁先生墓誌銘  
贈孺人沈氏墓誌銘

樸菴陶君墓誌銘

封孺人程氏墓誌銘

南京兵部侍郎質菴王公墓誌銘

顧文康公文草卷之七

東吳顧鼎臣九和著

誌銘

贈奉訓大夫翰林院侍讀學士張公暨配  
封太宜人劉氏合葬墓誌銘

嘉靖戊子以還 上益勵精學古圖治日進儒  
臣讀論經史翰林院侍講學士張先生潮風度  
整雅敷陳明鬯啓沃之功居多特被眷遇念母  
太宜人劉年幾八十遘痰疾不良於行三疏乞

歸侍養 上重其去弗允會以資勞累陞吏部  
右侍郎先生每嘆詫不懌曰忘親以饗美官非  
子也復抗疏陳情詞甚懇迫 上不得已命給  
驛以歸入門拜慶於床下太宜人悲喜交至曰  
吾恒慮不得見汝又慮以我故獲罪公義今若  
此爲榮且幸大矣天恩於何可報越三月太宜  
人壽終少宰以聞 上賜諭祭一壇仍命有司  
營葬如制蓋特恩也少宰將以某年月日啓厥  
考勁菴公兆祔焉公墓在飛鳳岡之祖塋葬在

弘治某年月日而誌銘尚闕誠有待於今日也  
少宰馳哀疏以都察院右副都御史高公韶所  
撰狀屬從兄貴州布政司叅議淑請銘於其友  
顧某誼不可辭爲叙而銘之張氏其先湖廣崇  
陽縣人入國初遠祖諱福七者始占籍四川之  
內江家焉福七生君佐君佐生原隆原隆生亨  
亨生復祖配李氏生三子長卽公諱大器字邦  
賢勁菴其別號也時三世同居聚族甚衆羣從  
遊庠舍公獨以少年總家政綜理有道庭無間

言年逾弱冠始就有司選充都司知印公爲人剛直不阿動循禮法都指揮某狡悍難爲下獨罷公嘗語衆曰張某非若儔也異日常有立役滿謁選銓曹授丙字庫大使故事羣吏歲時醵金幣獻中官勞以食飲乃退公拜起獨往立廡下訊之曰有疾不嗜酒肉羣豎惡之一日欲笞副使某公探袖中印視之曰辱我佐印必毀爾前衆驚劔不敢動秩滿擢真定府行唐縣主簿專理易州厰柴炭至則釐革蠹弊申嚴約束下

不敢肆時以工侍董厰事若曾公鑑陳公琬彭公禮咸愛重之較歲課率署上考公雖入仕猶日課家人生業自給俸入每推以入縣學師生鄉人在旅每濟其乏罹患難者紓解之歿者歛而歸之九載考最年甫六十拊少宰曰是兒當大吾門吾其已矣乞歸甚力銓曹嗟異擢湖廣布政司照磨致仕鄉先生南園張公東川劉公時宦於朝高其行作文贈之公娶余氏繼劉氏同郡劉處士孝集女性素謹重慈惠寡言笑樂

施予處親族有禮待婢僕有恩視諸從子女無異已出服飾雅不尚華靡少宰初第進士時迎養于京邸者數年迨歸鄉人見之嘆曰張母儉約猶爾也勁菴篤於孝友事考妣竭力承順得其歡心喪祭一遵古道不徇愚俗與弟大德同居既宦卽推舊業與之女兄寡而貧無所歸養贍之終其身凡此懿行皆太宜人贊相而成之公沒後十三年始得推恩追贈儒林郎翰林院編修又幾年進奉訓大夫翰林院侍講學士劉

初封太孺人進太宜人子男三長潭俞出明經累舉于有司弗偶隱居自好教授鄉閭次卽潮次洙皆劉出洙歿少宰績文礪行溫恭敏達器識宏遠卓然負公輔之望蓋勁菴初教督之甚嚴旣貴太宜人猶每以慎身永譽副先人之望爲訓厥所成就乃爾孫男五女四曾孫男四公生于天順庚申二月十六日卒于弘治乙丑七月十九日享年六十有六太宜人生於天順辛未八月二十二日卒於嘉靖甲午正月十有三

日享年八十有四銘曰邃古哲王立賢無方聖  
亦有云吾未見剛維勁菴公稟賦實良執禮行  
義自勝乃彊矢志卑官聲績日彰賢配遲歸天  
發其祥雍穆儉勤儆戒自將內外變成乾行坤  
章施于令子揭芬巖廊天眷不那孝致顯揚生  
死榮哀爲龍爲光飛鳳戔戔伉儷期藏鬼神撝  
訶子孫蕃昌

奉議大夫戶部郎中芮君墓誌銘

君諱元進字希賢其先應天府溧陽縣人永樂

中徙居居順天之寶坻曾祖錡贈通議大夫都  
察院右副都御史祖銅不仕父謙以監生爲山  
東臨朐縣縣丞累贈奉直大夫戶部員外郎母  
趙氏累贈太宜人繼母渠氏封太宜人君體貌  
魁碩性確而不固望之若厓異就之乃質任自  
然倜儻有容於所當操執侃侃不爲物下成化  
丙午以生員發解京闈卒業太學與四方之士  
游搜抉蘊奧增益知能日充以融謂甲第可唾  
手取人亦以爲然屢進厄於命則曰丈夫策勛

立名寧恃一第耶謁選吏部授右軍都督府都事丁外艱服闋改中軍府未幾以材選擢後府經歷所至能自砥律見重於武人時逆豎擅威福繫非辜數十人將置死地君憐之密食以糜正德辛未遷戶部陝西司員外郎署印浙江司適奸民輸公稅道路賂巡簡司移文稱所輸被劫君廉得其狀按以法壬申遷福建司郎中三載考最誥封今官甲戌九月八日以疾卒享年五十有七其生則天順戊寅閏二月初一日也君

事父母善委曲承歡友羣弟愛而能教處宗戚里閑無尊卑貴賤歡然有恩事官長際僚友恭勤愷欵忠告而與善遇事議論風生疏幹如流入官數年資用猶仰給於家君子美之娶田氏封宜人生二子長岵生員次炅君之樞歸自京師卽以是年某月日葬縣城東吳家道口祖塋同年牛君某於君爲姻家且同官狀其行請爲之銘曰芮之世舊宦門聚國族支彌蕃軋羣從君孤騫初鍛闕終飛翻武幕散郎署喧察恪虔



罔弗存協外內情義敦卽云施曷糾繁速溘化  
餘揭軒行足銘勒幽垣信可恃牛君言

同平勅封承德郎刑部主事張公墓誌銘

公姓張氏諱鑿字與鳴號清隱蘇之崑山人也  
曾祖旭祖能新城知縣父注潮陽訓導母丘公  
少穎敏隨父宦遊得口授毛氏詩歸以家累弗  
克遂其志未幾訓導公致仕家貧無養公出其  
緒餘爲里中子弟師大家歲有延致之者且日  
課諸子誦讀弘治乙丑子寬舉進士除錢塘令

公日使人以牧民之道爲訓民陰德之後轉郎  
署尋有恩命封公爲刑部主事時訓導公入袞  
康寧在堂公奉事愈謹朝夕問安寢不廢訓導  
公好客談叙家貧不能支公日具滌澹召故人  
賓客相與娛樂酒酣奉觴于親側笑語陶陶不  
啻少時之慕也正德丁丑寬遷廣東按察僉事  
奉詔得同冠服衆皆榮之邑里有如訓導公者  
咸約爲會訓導沒公繼之款洽凡二十年晚年  
尤樂與知己載酒選勝遊吟忘疲殆不易及也

識者比公陶峴信哉嘉靖壬午九月初四日忽以疾卒距其生爲景泰辛未十月廿有四日享年七十有二配陳有賢行先卒贈安人子男二長容娶梁次卽寬娶周封安人女四壻歸霑陳恩羅縉錢希賢孫男五廷彥娶郁廷弼娶龔廷臣縣學生娶全廷傳聘梁廷尉聘許女二壻馮廷儀其一幼孫男一玄紹女二卜以卒之明年十月廿四日葬公于西鹿城山塋之穆合陳安人之兆焉先是容等哀經踵門持大理屈公汝

爲狀來謁予銘予與公有中表之誼且再錄名于有司皆與寬同年受知深矣乃不辭而爲之銘曰惟昔張氏代有哲人生公不究厥德彌貞忽焉云邁美璧竟沈鹿城之原佳氣蒼鬱公歸于斯永焉朝夕

敬齋先生墓誌銘

嗚呼先生卒于弘治十八年某月日葬于正德四年某月日距今又四稔矣墓未有銘鼎臣之罪也蓋先生沒未幾而先考妣亦相繼傾棄煢

然無歸積疚腐心嗚呼尚能銘先生墓邪今復將遠離桑梓感念老成乃敢叙述爲銘刻石納諸地中先生姓朱氏諱某字德敬敬齋其所自號也世居蘇之崑山曾大父通甫贅於元名醫劉國英氏因通其術劉氏卒繼娶沈氏生時中時中娶李氏生英英娶亦李氏生四子先生其季也先生之生在宣德某年八月十四日年將弱冠受學于先達鄭進士介菴會縣選鄉塾子弟補吏員先生在列自言願卒學舉子時府通

判俞君署縣事試以文音之遂補學生名稱籍然一時從遊者甚衆七舉於鄉皆不偶成化五年先生當應貢其亞白上官親老家貧欲超次上官弗聽先生曰吾縱得祿不及養每念此爲終身恨彼幸有親在吾可不成其美邪遂讓之越明年貢禮部試入高等不樂從仕告受冠帶歸而偕諸大夫士結斯文會月一再集飲酒賦詩談棋終畧身際全盛享富厚之樂優閒者幾四十餘年年七十有七微疾而終嗚呼祉哉先

生性醇謹簡重篤于孝友歲時薦享必極豐潔常哀思諸兄惟仲德溫後亡事之如父撫宗族子姓過于慈與人無貴賤少長一於謙和而人自不敢慢初兄弟分財不均人皆怏怏先生澹然弗較後植貲更裕稱貸者輒與或不能償給曰吾政爾償適他急盍更少貸後將盡償輒復與不疑久之積券盈篋而負責者累幾千金亦有久而心醉其德者願推田廬償之先生讓曰姑徐田廬以遺爾子孫近歲黷貨吏見民多美

田精廬百計中削之必盡乃止人遂謬以爲先見先生恭儉出于天性一衣裘三十餘年未嘗垢弊閒居默然端坐雖處稠人廣座笑言簡寡不善酒一二行面發頰便假寐衣冠整飭風儀溫雅望之知其爲善人長者室秦氏生一女適訓導龔經子豫側室吳氏生二男澄清良善有父風女二長適鼎臣次適金吾衛經歷支琮孫珮孫男五曾孫男一鼎臣登先生門時年尚少蒙折體貌不以常壻目之及舉進士報至

疾已革及聞而瞑目銘曰嗟彼善人今之所侮  
曰維善人天之所輔鬱而未發爲善者是懼天  
道弗僭將日昌爾祚蔚然林丘翳于漢浦善者  
起敬茲維先生之墓

明故盛汝成妻沈碩人墓志銘

盛氏沈氏皆吳中舊族譜乘相甲乙累世以儒  
醫名家盛出宋叅知政事文肅公度至國朝永  
樂間有諱寅字起東者以醫學正科被 太宗  
皇帝知遇召對稱旨稱爲醫中狀元即日授御

醫汝成其第九子也汝成妻沈碩人其先汴人  
遠祖某亦以醫術仕宋扈從南渡始家長洲思  
陵手書良惠二字賜之六世祖瑛在元醫學提  
領祖以潛有文行事我 仁宗初爲太醫院醫  
士用薦擢御醫寵眷特深壽終少師楊文貞公  
誌其墓父孟昭母王氏生碩人幼淑順以慧精  
女事誦孝經曹大家小學諸書稍通大義在女  
行中特喜御澹素纈穠靡麗之飾輒推以讓其  
姊若妹而服勞佐禮居它人之先歸汝成屬舅

物姑老家勢中衰身親治生勤勩不厭適寒暄時食先意以娛悅其姑姑安之尤謹于祭祀豐腆必盡其力汝成齒長鑿益工名士求治者踵相接蠲美之供咸出其手夫黨親疎內外上下支屬甚衆處之爲難碩人恭謹和順惠厲異施宐于人人夫卒哭之過傷而喪之葬之無後悔每勗其子曰汝父自立于孤苦中平生抱技能無以自見死有遺恨矣汝曹能成其志乎長子早奉教益修其世業諸父汝弼功施于公卿間

聲稱藉藉爲郡正科三十餘年擇可代者至是引退以授早早領牒于銓曹膺冠服歸拜母碩人悲且喜者久之踰年以疾卒寔正德二年之七月二十九日也生正統丁巳三月十五日春秋七十有一子男二早娶莫氏建寧府同知震女杲娶鄒氏百戶鎡女女二陳珣劉序婿也孫男一人珂聘沈氏三孫女長適王珏次諸驥次尚幼葬在卒之明年十二月二十一日墓在吳縣奇禾嶺早持儒士王汝朝狀請銘于郡人顧

鼎臣述其系而銘之銘曰

清門岌業鬱相望女貞獲偶諧儷伉撐頽苴漏  
勤爾相敬姑怡色孝以養奉先饋賓潔尊盜令  
斯壽考沒非愴奇禾之陽土燥亢祔夫同穴成  
禮葬

朱文靖妻錢氏墓誌銘

文靖予妻之兄也予早歲爲館甥於敬齋先生  
門下見文靖爲人寬裕而於事動有調度無弗  
及患意必有資于內助之賢久乃知錢氏性行

之詳而歎其不多得未幾則又悼其歿而惜夫  
材且良者之不享遐壽也錢氏諱淑靜父諱用  
贛州府學教授爲鄉閭人母曹氏素著令名於  
戚黨間錢氏在室象賢而鍾愛年十九歸文靖  
事敬齋先生及我外姑摯愛而直易遇下惠利  
之而不爲姑息外內有所應酬品量輕重咸中  
機宐歲時伏臘祭宴餽問文靖或未嘗經慮而  
事無不治所需無不備勤以立業儉以成訓要  
皆得於所性而不遠於人情生二男長寅聘陶

氏次丑尚幼一女許嫁鄭吉予嘗謂若錢氏者其舅姑有婦夫有妻它日朱氏之祖廟有主婦矣而賦性不永止于三十有八其可悼也夫生于天順庚辰八月十八日卒于弘治丁巳八月五日將以辛未十二月廿一日葬于漢浦塘西之新阡文靖率其子求誌爲書其實且銘曰賦美有家人之安兮方植而傾延衆思兮膺膺高原幽宮基兮戀戀汝姑吉同歸兮生歿情鍾永相依兮世德保終千古以爲期兮

明泉州府同知朝劉大夫梁公繼室陳安人

墓志銘

安人姓陳氏其先松之上海人大父諱宗信贅于崑山顧庄顧氏遂占籍焉力本業善樹秫佃儻有爲所交游多名卿長者父復初能以農桑卻暇涉獵傳記座談可聽配沈氏生安人自幼端靜有女德稚齡失恃哀傷動人梁公統室周安人物擇可爲繼者聘焉及笄歸公公世宦家族衍以繁父文輝以平定知州卒于官歸麓無



賁家仍儒素祖母張高年毋太室人吳孀居二遺息尚在襁褓宿奴故婢皆閱事含智內政所屬交倚羣望處之爲難安人承上撫下協內應外動無違室公安之得一意卒業取宦初以鄉貢士選授德興縣學訓導秩滿陞漳州府通判尋陞泉州府同知所在名績卓然稱其家承內助之力居多安人孝慈寬大根於天性執婦道甚謹吳室人性嚴重見之未嘗不下辭色歲時祀先膳羞酒漿必躬自臨治宗黨婚姻問遺違

來務盡其情泉州乞休養毋不獲安人惻然辭歸至則吳宜人已遘疾朝夕視湯藥親抱持不離左右卒之日悲摧幾殞含歛奠哭咸中儀法泉州致仕年尚強縉紳耆舊相要爲文酒之會或探勝近郊或辟囂禪林所須不時夙戒薦共無不飭辦安人素有虛羸疾至是加劇遂卒實正德十六年十一月二十日也享年六十有七以漳州判郡時上官疏異政得貶今封子男七鳴鳳馬湖府推官鳴鶴國子生周安人出鳴鸞鳴

鵬俱縣庠生安人出鳴鷓早卒鳴鵠鳴鷗側室  
金出孫男七孫女十一曾孫男四女六安人鞠  
育諸子皆若已出視諸子孫婦愛均一體諸子  
孫亦孝敬承奉過于所生同堂聚處無慮數十  
人安人一身主持其間大小肅睦庭無間言如  
是三十餘年于乎賢哉安人識度落落不爲媿  
姍私昵鳴鳳筮仕赴蜀以道遠艱于迎養依依  
不能去慰諭之曰汝能守官職承繼汝父斯孝  
矣毋以吾爲念也訓迪諸子不忘怒厲鳴鸞鳴

鵬學旣成累蹶鄉闈則慰之曰疾遲命也毋悶  
焉臨終戒諸子孫惟荒墜先緒爲恐諸婦乞言  
諄諄以和順勉之鳴鳳等卜于嘉靖甲元十二  
月三十日祔葬泉州兆持狀請銘銘曰

士喪厥偶鷓悲嚶兮俯仰涕涕但中情兮履霜  
之悲哲夫所懲兮粵求女賢壺儀是承兮琴瑟  
載張外內交稱兮德罔弗宐慈以爲經兮胤嗣  
日多異巢同鳴兮翼覆喙哺孰爲已生兮孝養  
後先和氣盈庭兮寔疏慶源世繇以興兮旣福

所伏毀以為成兮於乎家人利女貞兮

明文林郎德安府推官在竹梁先生墓志銘  
先生姓梁氏諱鳴鳳字九成別號在竹其先河  
南汴人八世祖諱孔彰元重慶府同知孔彰生  
仲德桂陽府通判先任崑山州同知因家焉仲  
德生玉婺州路經歷玉生璨入國朝為山西  
太谷縣主簿璨生子孟鏞館陶縣主簿孟鏞生棟  
不仕棟生昱山西平定州知州昱生統福建泉  
州府同知配周氏贈安人繼陳氏封安人先生

之考妣也先生自幼警敏弱冠藝成充邑庠生  
偕諸弟講習家學弗懈臺試每占上第數舉於  
鄉不偶正德戊辰援例入太學成寅謁選吏部  
選人較藝無下數百人先生名在第三得授四  
川馬湖府推官馬湖地險惡多蠻獠窟穴府所  
轄皆長官司守土官安姓者承襲弘治中始設  
流官俗尚未變先生至即攝篆理積務乃勞心  
焦思鈎深摘幽務得下情獄繫盜數十人廉得  
其枉悉破械縱之遠近歡呼稱為神明瀘州庫

卒盜金久乃覺州吏撈掠後守者將傳致其罪先生承上官牒往按之事遂白一時賢聲翕然居數月條陳地方利病數十事上官悉罷行之仍移文它郡令視爲準則嘉靖壬午丁內艱去乙酉復除湖廣之德安府內地民醇先生乃夷易應物事無鉅纖剗決無畱滯屬縣長吏某墨敗陰求納賄以免叱而却之卒正以法年未期政譽更出馬湖上忽一日暴疾卒僚屬士民間之無不驚悼寔丙戌之九月十七日也其生成

化丁亥二月初十日享年六十配夏氏側室褚氏子男一會國子生女五長適周枳先卒次適顧大有次適顧履方鄉貢士次適周仲詩次適鄭若羔孫男四之培之材之器之用女五會將以乙未年七月二十六日葬先生于小虞浦之先塋馳書幣奉南京太常寺卿矯亭方公鵬所述狀請誌銘於鼎臣余二人於先生締交甚久又俱爲婚姻家知德則詳先生早失恃事泉州公暨繼母陳安人備極愛敬柔聲怡色先意承

志常若有所不及撫諸異母弟友于之情藹然而不廢率教家庭雍穆內外無間言根本既立故施諸政事卓犖可觀惜哉降年不永功業名位止于是耳銘曰

清門世宦慶澤攸瀦代有令人爲璠爲璵迨於節推學古象賢佐郡蜀楚治効卓然宣幽使朗噓枯使生却金暮夜法用不傾家範官聲評重月旦喬木遠揚若爲中斷齒弗逮德天寔爲之將鬯厥後蔚然駢枝虞浦新阡川原紆煦卜吉

以藏何千萬古

明故贈孺人沈氏墓誌銘

孺人姓沈氏諱玉華其先出齊太子家令約世爲浙之烏程人在元有諱原澤者爲千夫長有捍衛鄉邑功見嫉于同事辟徙宜興國初以遺材進爲代州同知有聲曾祖彝不仕俱贈都察院右副都御史父暉明經舉進士官南京工部右侍郎致仕爲時聞人毋卞封淑人孺人幼謹重而慧授書記誦背易爽悅人意長事綉製蠶

繅不煩女師所成皆出他女上工部公愛之曰  
必得良配適少保吏部尚書上元倪文毅公同  
官南京爲其子今中書舍人霽擇婦遂締盟焉  
年十八而嫁已不逮事文毅左右其姑袁夫人  
居平持病旦暮織大舉職無遺從夫官北京日  
躬視案趣入朝歸必問所事事與所居游有不  
可卽從容諫曰恐非所以紹前休慰母氏也違  
姑久屢勸夫爲歸省計不果袁夫人沒奔喪水  
行涸舟固請陸不憚勞勩居喪哀毀值忌辰設

奠爐烟中肺成疾愈而復作逾二年爲正德癸  
酉某月日竟卒其生成化丁未某月日數其年  
止二十有七爾爲人心性明達知所重輕養姑  
祀先必親具饌羞薦獻有禮兄讓游太學子紹  
甫晬腹痞見之曰吾父始得此孫今若此抱歸  
醫療甚至迄愈而歸之已無出媵生一女珍愛  
特甚忽發驚搐力疾起抱置懷中或以爲言弗  
顧用是加劇瀕死猶拊而泣曰吾不見汝成人  
矣暇日溫習嘗誦書以示不忘父訓有切于婦

道者必玩繹數四脫珍飾畀夫置田為恒產今  
有賴焉其所見卓卓類如是至承尊御卑條析  
家治當人情適事體乃其細不暇論卒之明年  
八月例贈為孺人霧將以十月某日葬新亭鄉  
岡墓村先塋撰狀請銘鼎臣曰女教之廢久矣  
貴富鉅宗如二氏者為之子弟且難奚况女婦  
賢若此法宜銘銘曰

其生如歸鼎食綺襦百兩之將德載維輿凡彼  
婦非宜有一無終始孝姑警戒成夫有所贊經

久大是圖既鮮蘖芽復頌本株天之靡常可以  
悼吁我銘神呵賢婦室廬

明故樸菴陶君墓誌銘

崑南尚書浦舊名于墩永樂間夏忠靖公嘗奉  
命復之民樂其成更今名浦南出于澱山湖北  
達于吳淞江亘六十餘里凡所鬱紆輒停蓄靈  
氣為村保聚廬多富民間有顯者若世號善良  
子弟多孝秀則陶氏為最焉君諱繡字遠之別  
號樸菴曾大父士賢大父誠父慄母王氏君幼

履文康公集卷之七  
三  
挾異資有用世之志厥父爲有司所選倚久掌  
公稅君遂以童年摠家政幹內應外緩急軒輊  
咸中機宜父用忘其私旣長益畢慮殫力恢拓  
先業日以殷裕延經師教子孫不惜重費倡其  
弟元城君綵割田助役以濟族人從父孤歲廩  
給復推已業以植其後從嫂鍾早寡無所倚迎  
致別室衣食之厥父沒五月側室生遺腹子育  
教擇配授田廬用底于成仁其三族逮里中窶  
人揮粟帛鏹不爲難非已有不苟得也義聲聞

遠邇有不平者多就決焉君娶于氏繼李氏側  
室支氏某氏生子男七人文林文學文淵文徵  
文載文炳文思文華林千戶所吏目淵領順天  
已卯鄉薦炳邑庠生女一人婿朱邁周齧姚鳳  
儀陳僑朱希契錢士餘幼孫男女一十三人曾  
孫男女五人君生于成化丁亥十月某日卒于  
嘉靖壬辰五月某日某月日葬三沙岡西之祖  
塋前期文淵走疏并致朱邁所述狀來請銘邁  
吾妻之兄之子也以文行稱于邑庠言可徵爲



序而銘之銘曰

澱山之浸溢爲大川訶原走野演迤蜿蜒迴沿  
清門地靈昭宣累善而發其興沛然菊隱于公  
公私竝利樸菴克家美濟厥世衣冠蟬聯群曰  
第第施于子姓翺翔賢科福澤大來如川斯波  
沙岡之原高培我我吉人是藏鬼神撝訶

明故封孺人程氏墓誌銘

正德十有三年四月十一日監察御史張君翰  
之配封孺人程氏以疾卒越數日君持某人狀

來請于鼎臣曰吾婦年甫四十爾賢也而何化  
之速也將以來月之四日葬于畏吾村之先塋  
願得先生文納諸墓中庶不泯其爲人君吾同  
年也誼不可辭乃序而銘之孺人名惠秀其先  
山西平陽府之臨汾縣人遠祖思道國初官平  
陽衛指揮僉事後爲他所註謫隸南京羽林  
衛軍籍永樂初改長陵衛遂家京師父榮倜儻  
多能通堪輿家周旋諸搢紳間孺人生而婉順  
父愛異之擇所歸得張君旣而奉其舅贈御史

公姑太安人劉日夕孝養無怠宗黨咸慶得婦事夫交愛警戒時脫簪珥購書佐讀于夫之妹五人處甚洽及嫁輒損已奩具以助之後止餘一篋亦無怨言張君舉進士爲行人兩使宗藩及遷御史出按山東湖廣二省孺人深居自閑戒童奴謹門鑰君恃以無內顧憂得殫志激揚聲大起孺人性甘澹泊室無私藏自于歸迄被寵命謹約如一日未嘗強其夫求珍麗益服飾以姑疾夫又在遠持齋素者十餘年得疾之明

日召家人訣曰恨不得終事吾姑囑夫曰汝寡貲殯葬隨力佛事可無作戒子曰爲善以繩父休家人初謂疾爾也不旬日果卒卒之日尊之姑卑之妾婢與宗黨之老鄰里之媪驚怵奔赴咸哭盡哀止生一子曰維一女側室出尚幼撫愛如已子孺人賦性閑靜故不昧于識不移于俗內盡厥職外絕非度以克承其宗而成其夫於乎可以爲賢矣銘曰

姆教曠弛壺爨廢俗流競靡滋弗類遊遨往復

肆無礙指擬掩曖沸狂喙侃侃待御得賢配家  
人之利在乎內浣服縑素茹蔬菜維禮爲飾德  
爲佩矧于恒典寧有悖孰表遺範用爲誨示民  
反俗此賢在我銘其幽重增慨

明故通議大夫南京兵部右侍郎質菴

王公

墓誌銘

正德中禮部尚書三江先生毛公一日過鼎臣  
曰質菴累疏請老去甚力我輩宜有言贈之然  
非先生無能發揚其美也固辭不可具稿似公

公折簡復曰此文當與韓退之送楊少尹巨源  
序爭衡夫質菴之去無媿于巨源吾之文敢擬  
于韓公蓋一時獎借之言然亦可以見前輩風  
流樂與人善類如此後二公相繼捐館乃今復  
按三江之狀銘質菴之墓俛仰浮世儵或陳迹  
其能無所感耶公姓王氏諱倬字用簡別號質  
菴其先瑯琊臨沂人裔出晉光祿大夫覽覽之  
孫鎮東司馬導扈元帝駕南遷居江左周顯德  
中明州衙推仁鎬始居分水宋漕貢進士宗成

始居蘇之崑山湖川鄉湖川近割隸太倉州故  
今爲州人公之高祖方澤曾祖琬俱不仕祖琳  
以公貴贈通議大夫南京兵部右侍郎妣石氏  
贈淑人考輅累贈通議大夫南京兵部右侍郎  
妣張氏累贈淑人公幼敏慧有至性甫七歲外  
祖素菴先生授以小學數月悉成誦無一字舛  
遺素菴語女曰是兒必昌大汝家八歲祖母歿  
朝夕哭柩側不去人爲之惻然弱冠從工部都  
水司郎中吳公瑞受周易復偕邑名士若梁公

純秦公瓛管公琪朱公棫輩日相與窮所經義  
四聖精微之奧搜抉殆盡淵源所漸崑士迄今  
賴焉成化辛卯領應天鄉薦戊戌登進士第約  
同年同志十餘人講究律令久之遂深于法理  
己亥除浙之山陰知縣舉隳廢雪誣枉政治爲  
八郡稱首九月以憂去改江西餘干二大姓爭  
田三十餘年連引至千餘人多瘦死公親往臨  
視斷以數言訟遂息柴氏兄弟爲余典所殺獄  
久疑未決公獲得其情訊之曰非汝殺人何爲

竊其尸與叩頭伏辜訟牒紛然剖析斷遣無留  
滯囹圄爲之一空顛盜橫殺縣官御史檄公勦  
之賊據山險下木石衆莫敢近公夜驅千羊入  
山縱火鼓譟尾其後比旦木石俱盡縱兵急擊  
破之俘獲三百餘人斬首千餘級賊遂平上官  
方交薦其功能復以憂去改知蘭谿旣視事縱  
里胥逋租繫獄百數十人蠲其遇宥者餘約令  
二年補償人情大歡捕盜竊摘奸伏民稱神明  
豪猾遠竄不敢喙息弘治乙卯擢南京山西道

監察御史先後劾免不職大臣二十餘人輿論  
稱快巨璫楊某怙使命驕橫至箠擊進士公抗  
疏劾罷之北虜入寇公屢陳邊務鑿鑿可行

上皆采納壬戌擢貴州按察司副使屬米魯福  
祐二賊構禍甫息境猶騷然公加意拊循乃定  
土官阿偉負固傑黠不出見上官公召之卽出  
俯首受約束而去正德丁卯以例裁革改廣東  
瓊州兵備瓊當符南蛇亂後復苦黎人擾害公  
督健卒分布要害邏獲甚衆賊惧請獻出所虜

男女爲贖許之境始帖然崖州千家等村賊起勢甚熾公數駕虛聲以聳之而兵久不出覘知其怠乘夜掩擊連破二村賊震懾出降乃分三大村爲數小村以弱其勢復奏建守禦千戶所爲經久之圖賊不敢動己巳陞雲南按察使尋陞廣西右布政使會勦臨賀砦克之餘賊匿山谷中衆欲乘勢繼令盡公不可遣人諭以禍福悉出降事聞

上賜白金文綺以旌之辛未進四川左布政使下車不數月剗革錢穀積弊幾無遺旣而盜起將犯成都鎮守內臣議焚附近民居以絕窩隱之患公曰是張其勢非計也勒兵結營洞開城門以待之賊不敢近總督軍務都御史洪公鍾統帥土漢兵二十餘萬討賊郡縣罷于運餉民多道死公出庫銀購粟貯各倉量道里給之民免轉輸軍無闕乏後總制都御史彭公澤復帥兵勦餘賊下令致期需馬二萬疋熟米四千石公授有司以方畧如期而辦彭大奇之癸酉進

都察院右副都御史奉勅整飭薊州邊備兼巡撫順天等府適歲歉民饑人相食公請發通州倉餘糧十萬石義勸富民銀二萬餘兩權宜以賑之全活不可勝計復奏修邊牆四百餘里上嘉其勞加俸一級虜犯邊射殺叅將陳乾鎮巡屯兵馬蘭谿以備之公策賊必乘虛自東入亟調精騎四千餘設伏以待之賊果入自東伏起擊賊大敗

上降璽書獎勵復有金幣之

賜乙亥陞南京

兵部右侍郎與尚書喬公宇協恭明謨修舉舉務一時本兵號稱得人丁丑秩滿三載考績至京因上疏引年不允吏部奏最給祖考妣考妣誥命蔭其孫世德爲國子生公自任布政使至是數年間乞休之疏方十三上皆奉溫旨勉留戊寅年七十二又連上三疏懇乞致仕上不得已允之詔給驛以歸仍令有司以禮存問蓋異數也優游林下又三歲而終寔辛巳三月九日其生正統丁卯十月二十八日數其年

傳文康公集卷之七  
得七十有五  
今上聞之詔有司營墓如制并賜諭祭一壇  
墓在麋場涇祖營之側墓在嘉靖二年十二月  
十有八日公初娶陳氏贈淑人無出繼亦陳氏  
贈孺人生子愔國子生女二長適衡州府同知  
葉夢淇次適盛有成俱名宦家子再繼亦陳氏  
封淑人生子忬領應天辛卯鄉薦女一適國子  
生史璠孫男二長世德次世業國子生孫女三  
長適周允元國子生次許嫁金允中魏希哲公

爲人仁厚惠利而果毅有爲練達機警而處物  
平易不爲矯訐鄙陋小廉曲謹而忠孝大節不  
隳居親喪悲哀執禮三載不渝事兄南京工部  
郎中僑并佳健曲盡恭順創建家廟割已產置  
義田手書規條以授宗子俾世掌之自奉儉薄  
而厚于濟物祿俸之餘每分及族黨故舊師資  
執友罔不周到雖遠戍之卒行役之氓饑寒患  
難告于公必滿所欲卓識絕人利達禍患不足  
以動之逆瑾擅權之日親昵中勸公納賂以自



全公曰生死貴賤命也使我盡喪其平生貴不  
如賤生不如死爾仕優而學暇則與諸生講論  
經義常訓子情曰法可畏不可玩天理二字不  
可遠去于心聞者以爲確論在公無大小外內  
治官書理民事惟日不足剴繁治劇排難解紛  
不遺餘力未嘗時刻宴安自便故雖細民邊夷  
罔不德公繫去後思貴崖二州立生祠以祀之  
久而不衰庶幾所謂夙夜匪懈古之遺愛者與  
獨恨無當途有力者薦引之使立乎

本朝是以功業若是而止爾銘曰  
世胄聿興間氣挺生明經起家行立藝成洎于  
從政維民之貞盤錯歷試刃新發劓炎荒絕徼  
瘴癘飽夏左輔旬宣留都貳卿舌端風雷胷中  
甲兵敷歷所至邦畿底寧詎曰弗克致身台衡  
自信自好滿覆是懲勇退考終保節完名大莖  
備物生死哀榮吳山貞石勒茲新銘論世考德  
斯文足徵

顧文康公

遺集

目錄

甲兵

章

遊

昭

蘇

顧文康公文草目錄卷之八

記

遊馬鞍山記

昭德祠記

蘇州府儒學兩廡祀像記

特檜樓記

堂記

傳

中憲大夫思南府知府二南張公傳

賦

中秋賞月賦

顧文康公文草卷之八

東吳顧鼎臣九和著

記

遊馬鞍山記

滄海以西平原百里無尺土之限洪濤洶湧勢若吞焉馬鞍山特起與之角巖然婁江之濱體勢凝重而巒石背起立睚眦相對海潮至此亦披靡帖服嘗試評之如孤軍在野解鞍休臥黠虜疑而莫之犯又如鴻門驍將髮豎眦裂敵懾

而不敢動其勝可想而見也故胸中稍有蕭曠  
之味者皆知遊焉然秋冬落莫則寡遊又非達  
士之尤不能也已未十月二日天存朱先生招  
同志凡十三人逸而玩世者五人周邦禎趙德  
聚葉宗淵沈廷修其一天存也不仕而膺封爵  
者二人攷學王公吾兄自如先生而芝雲主人  
周則有待於是者也登冑監者二人朱天成黃  
宗達遊邑學者二人衛光績暨予而應祥周先  
生則有司以貢焉者也出處通塞不齊皆浩然

抱丘壑之志於山有契分焉所謂達士之尤也  
攜妓五人雜伎從者八人工歌者二善樂者六  
皆極一時之選吾山亦弗見絕焉者也衆集野  
鶴軒軒在山之陽頗幽敞北窗收山景作圖障  
每欲坐對盡日而不果日將午入山樂前導迤  
邐而西憇桃源洞天俯視城郭編廬櫛比咸謂  
出塵埃之表矣北上攀石磴或二三成羣叫號  
相攜或自詫矍鑠獨行若飛扶一妓者二妓扶  
者掖二蒼頭徐行者行半里許衆皆草坐石下

樂聲出烟雲之上過此路紆而轉峻風日晶肅  
客皆發雅興騰而上至絕頂見華藏浮圖毀剝  
興稍魴却立釋子二三輩出迎路左主人揖客  
登卧雲閣觥酌旣飭客齒坐而妓女雜其間介  
之者忻然若有獲焉否者望之若慕焉弱者徒  
而就強者或攘而去焉釋子供茗立俛不敢視  
或竊窺焉歌樂迭止作觥傳如流客呼酒恒恨  
不及已而奕者闡者投壺者負者顧喜而勝者  
乃悔焉且酣卽春風亭望文筆峯亭若飾而美

也峯若增而高也崔嵬砢礪亂石若層雲驚湍  
變態千萬意昔秘而今始出也極天滿地勝觀  
不可名狀衆皆環坐亭下呼酒益急歌樂襍沓  
予獨振衣踞巉巖客或從焉其長袖颯纒麗服  
颺菁貽藐流盼者馮虛欲凌倚風欲歆傾日欲  
銷盡態而爭妍客相視疑非人間世也旣暮循  
舊路燈火延數百步僕夫隨酒遇快意復滿飲  
三四觥懽呼歌笑震撼如市客皆醉且散屬予  
記其事予以不飲得窮景物之奇且悉歸而記

爲茲遊也樂事比于桃李園歌舞不讓于東山  
老妓抱琵琶凝纖歌予最少握毫述以文彷彿  
得潯陽滕王閣故事古人得一以爲勝今悉具  
焉不以爲勝乎江山千古人事不常風流汗漫  
如茲游者又安知何日復繼也書以俟焉

特檜樓記

予性愛山以登眺爲至樂處城市闐闐墻屋障  
碍如坐井中甚不能堪故所在必構樓樓無大  
小必闢四牖資眺望也初宦京師每散朝出長

安右門見西山紫翠橫馬首嘆曰都城有此麗  
景不可使頃刻不接于目也遂卽所居之後圃  
構樓二楹高可縱目廣可容膝適了已事爾客  
聞而落之則大笑曰先生所見何私而不公隘  
而不弘如是耶真不能避風雨貯圖史悔之居  
數年因戒家僮每附舟將食粟來必致杉材中  
梁棟者一二以從旣足用乃市羣材倩衆工拓  
樓爲四楹高視舊增二尺餘廣三倍焉于是陰  
晴寒暑之變主賓周旋獻酬之地坐卧凭據百

爾之用亦畧備焉公事隙暇時一登眺或居閒  
無事坐靜觀山不復他徙烟雲吐吞氣候晦明  
不可名狀或高或卑時近時遠變態百出景與  
情會神爽飛越此身恍然如在震澤之濱聚塢  
之區矣容知其尚縈縛于塵纓也哉樓向未嘗  
名因攬挹之富不可遺漏難乎其摹擬爾忽一  
日倚南闌翫羣植而老檜特立其中自根至杪  
無分毫欹曲蒼翠之柯扶踈龍菴可親可怡肅  
然爲之起敬嘆曰是檜吾管是居時手植也初

高纔三尺餘今近十倍矣往來相守已三十年  
狂飈震霆不爲之傾嚴霜密雪不爲之凋日夕  
鳥雀啁哳喧啾于其中而不爲之厭嘗儼是居  
于一朝士繫馬牧猪園中花木根株蕩然而此  
樹獨存無恙固其稟受不同於他植夫亦鬼神  
默佑正直而撓訶之者歟遂以名吾樓曰特檜  
客聞而讓之曰先生之爲斯樓以山也今名不  
以山以檜其義何居予曰吾樓之勝概非特山  
也 大內之層宮複閣崢嶸於其東都城之麗

雉堞森聳于其前琳宮梵宇闕闕甲第參差  
于左右者可以得之仰瞻盼矚之間然皆外焉  
而非內也遠焉而非近也虛焉而非實也斯檜  
待吾而有吾固得有之矣吾樓始於山終於檜  
舍彼而就此奚爲而不可哉曰如然則樓惟南  
其牖足矣惡用旁啓二牖爲哉適于已將不適  
于比隣乎予矍然謝曰吾過矣吾過矣不達于  
世務之故也微子言吾何如改請永閉二牖收  
歛心目日對吾檜與之從事乎

### 正氣堂記

監察御史謝君琛按吳門之五閱月上言故宋  
少保右丞相信國公文天祥當宋之季年以勤  
王之師開闢平江凡幾月而去雖事出倉卒而  
功德顯著去之數百年而郡人思之不忘法應  
祀典今其子孫有流寓吳中者願出地建祠按  
其譜系僅八世而邇而私家祠祀非出於朝  
廷之公無以慰郡人之思宜令有司卽地建祠  
歲時郡長史致祭復其子孫一人守之制曰



可於是。是有司奉。詔惟謹。越歲祠成。又於祠之  
隙地爲堂。三楹。大學士長沙李公東陽大書其  
榜曰。正氣堂。取公所作正氣歌而表識之也。其  
宗人監察御史森屬鼎臣爲記。夫一元之氣。其  
初混然。陰陽迭運。不齊而邪正形焉。是故爲災  
祥。爲治亂。爲君子爲小人。爲華夏蠻貊。雖變故  
相尋。而正氣之在天下。未嘗一日泯也。是氣也  
得其常。則爲君臣之都俞父子之慈愛夫婦之  
和樂。得其變。則婦死於節。子死於孝。臣死於忠。

不可易也。君子得天地陰陽之正。而不虧於物。  
故其氣之所至。雷霆爲之威。日月爲之明。霜露  
爲之變。金石爲之開。江漢爲之回。鬼神爲之昭。  
靈四維。賴之以張。三綱。賴之以正。人極。賴之以  
立。聖賢之教。賴之以不墮。孟子曰。我善養我浩  
然之氣。又曰。其爲氣也。至大至剛。以直養而無  
害。則塞於天地之間。文公當宋末。造以身殉國。  
殫力恢復。屢蹈而益奮。國亡繫虜。不屈不撓。屹  
然如山。卒之從容就義。視死如歸。身荷三百年

綱常之重死而未已是非浩然之氣克塞天地者能若是乎公之言曰受宋厚恩豈事二姓嗚呼南渡宰相如公誠負空名所蒙幾何若秦檜賈似道陳宜叩畱夢炎之徒豢養富貴恩數優渥而嗜利偷生賣國降虜恬不爲異自公視之氣息奄奄誠如鬼蜮固不必論其邪正而百世是非斧鉞之誅萬死不赦吁其可監哉論者又以公知平江凡三月爾名實未加追而祀之其義何居君子曰胡元之禍宇宙厄會三光不明

人文幾塞惟公爲能信大義嚴大分守正處順其節可上擬於夷齊之諫周孔明之輔漢皆欲仁得仁功殿一代光昭四裔立則作準施於萬世孔子曰微管仲吾其被髮左衽矣故絜德度功應所在廟祀矧公嘗守茲土而以爲過乎誠使郡縣之吏歲時對越學士大夫載瞻遺像族屬世胄仰思前烈油然而興起其忠孝之心則於國家治效豈小補哉謝君天子憲臣持斧畿郡崇正嫉邪所至以褒表忠

賢為事其亦有見於斯乎



昭德祠記

昔者聖王之制祭祀也法施於民則祀之以死  
勤事則祀之祀也者上之人所以風示群下昭  
有德而明勸懲也嘗考之班孟堅傳循吏盛稱  
蜀郡守文翁仁愛好教化終於蜀吏民為立祠  
九江召信臣守南陽視民如子化大行吏民親  
愛號曰召父元始間詔書祀百辟卿士有益於  
民者蜀郡以文翁九江以召父應詔歲時郡二  
千石率官屬行禮奉祠信臣而南陽亦為立祠

夫自古循吏世不多見在上之人所以風示之  
故既沒而名益彰彌遠而其流無窮也文翁當  
景帝末召父當元帝時一則百五十餘年一則  
四十餘年然後始舉祀典何也蓋遺愛洽於民  
心必久而後定上之人亦因以風示群下昭有  
德而明勸懲焉是固聖王所以制祭祀之意也  
我 國家興化致治厚養元元崇獎循吏可謂  
至矣我

皇上中興尤惓惓焉嘉靖庚寅

詔諸處祀忠

臣孝子功利一方者於是臨清之民以故知州  
事夏<sup>某</sup>治多惠政勤事卒於官既列祀名宦矣  
相率爲立專祠疏請於 朝著在祀典嚴之民  
聞之曰公嘗爲郡推去嚴之後立愛民父母碑  
於通衢及卒於臨清計聞亦既列祀名宦矣其  
德政在人心人不能忘今

聖天子下明詔祀功利一方者舍公其誰廼相  
率鳩工庀財營構祠宇遂叩 闕請著祀典如  
臨清仍乞錫之祠額我

皇文康公集卷之八  
皇上俯順輿情下禮臣議以爲應祭法所謂法  
施於民以死勤事之義錫祠額曰昭德其在臨  
清曰褒賢竝給焉令有司長吏春秋祀如儀於  
是嚴之縉紳若南京刑部侍郎王君浚等僉謀  
曰是舉也民之情也

聖天子所以褒顯循良異數也不有制作勒之  
貞砥其何以彰盛典而示來裔乎迺合辭以狀  
請記於予予素知公德且公之元子桂國少傅  
兼太子太傅禮部尚書武英殿大學士桂洲

某

爲時元輔

某

實忝同丞弼其何能以不腆辭謹

按公世家貴溪以弘治己未舉進士解褐爲嚴  
州府推官嚴故號淳朴其狡悍者或好囂訟公  
秉心仁恕持法明允不事深文苛瑣詳讞之下  
多所平反其俗婚葬率沿敝習不繇禮制貧民  
生子女多不舉至投諸水公刑其抵禁者俗爲  
之革其他若均更徭定折稅宣德意以爲民興  
利祛弊贊協牧守力任而推行之吏畏民懷合  
境翕然比三載考績遷知臨清州其治臨清猶

其治嚴也州當天下水陸之衝供需什九民不堪命公善拊循稍遂蘇息時正德初中貴人用事橋虔為姦公摧抑之無所於撓居五載節用愛民興學闡教不遺餘力竟以勞瘁卒於官卒之日囊無餘貲至不能具棺歛其雅操可知矣予惟公之賢所至皆有惠政信乎古所謂循吏也公之去嚴殆四十年去臨清亦且三十餘年聖天子一旦下明詔舉古聖王祭祀之典以風示群下而二州之民思德不忘嚮風若此非公

德化入人之深曷克以致是耶比於文翁召父不足多矣嗚呼公身不都崇爵而沒享榮贈如元子官用不究厥施而慶鍾於元子相業著當世生不介耆齡而食報於二州之士者為無窮他日傳國史著循吏蓋將與文翁召父齊休光於千載也乎遂書以為記又從而歌之曰  
粵若炎漢崇循良文翁召父遙相望化行西蜀暨南陽遺愛炳炳民不忘寂寥千載榛荒豺虎接跡鴟鴞翔公才瑰瑋如珪璋力挽浮薄祛強

梁仁風駘蕩惠澤彰媿美在昔流聲光溫綸下  
逮砥萬方錫祠昭德輝龍章廟貌翼翼山蒼蒼  
春秋秩祀著太常神來宴娛陟降堂靈旂繞獵  
羽旆揚焱馳景迅何輝煌蕙肴蘭藉芬椒漿嚴  
之烝人樂且康報公伏臘期無彊

蘇州府學初作兩廡從祀像記

正德四年秋太守林侯以兵部武庫司郎中來  
刺是邦謁先師於郡學顧瞻良久卽講堂進學

官諸生語之曰士後聖賢而生學其道孰不思  
覩其形容故飾廟貌以崇祀禮亦宜之漢初以  
繪事後尋易爲塑像隋唐而下代因之迄我昭  
代國學厥有明制今茲殿有像廡以主在物爲  
未稱在禮爲無則不可及觀祭器服物久多闕  
壞益咨嗟弗寧惟政本之隳是懼慨然思作而  
新之則又念嗚游凶官貲無餘乃推已俸若干  
緡諸生慕義者三百餘人咸願出私財以相厥  
成市材鳩工僦役從事以委諸學官而屬訓導

李鶴專董之衆皆承奉德意協勤效能而經度  
委密率稟受于侯質埴土物色異貌衣冠隨其  
時制凡塑群賢諸儒像一百一十有一貯以木  
龕下承甃爲臺龕受像四補治殘闕增飾漫漶  
祭器二百九十有四樂器一百七十有八祭服  
冠帶各六十有二舞衣如佾之數其度閣懸載  
雜治之器總三百四十有奇維像既備維器服  
既富且美維采章體物則合于度矣工始于明  
年之二月壬子訖于五月辛未侯擇日致齋舍

菜于廟文物煥然改萬目觀八月丁亥薦歲事  
乃大合樂肆陳俎豆自諸有位暨百執事興俯  
陟降若親炙孔庭而往哲儀形恍惚具在禮明  
樂備神宜人和協于大典前此未之見于是颯  
颯乎咸頌侯之功不置而學官諸生因請徵文  
于鼎臣刻石紀之侯不能止嗚呼吏爲政不知  
所先務棄吾民久矣豈惟棄之峻刑黷貨從而  
戕之是以王風日微至治日遠識者用痛心疾  
首我侯首新學政爲吾民者甚厚繼撫凶饑念



財力未裕憂傷中盡而慮處甚遠心事明白威儀雅重確乎粹然其大者立矣蓋尊甫尚書公緯文卓行爲時之望侯世美象賢君子夙以遠大期之治郡功名信已超出常流如此然則士樂育于斯涵濡于禮樂其永永毋忘侯之功窮居以成身出而顯名其始終險夷一節爲孝子爲忠臣無忝孔氏之徒上以副國家設學養士之意下不負侯所以厚民作成之心斯善矣不然徒華衣冠談詩書誇諸人曰我爲士我爲士

實與愚民等耳雖聖人與居無益也奚以像爲奚以禮樂而急之爲務哉侯名庭梲字利瞻福之閩縣人

傳

明故中憲大夫思南府知府二南張先生

傳

先生崑邑人諱汝舟字濟民以鄉貢起家歷官南昌思南郡故二南其別號云

先皇帝朝不造多難倖監煽城狐之奸逆藩掉

金魚之尾賴天保幸奠金甌而一時磔躪薦紳  
糜爛士類則幾奄息矣然世知居中造蠱者舉  
朝側目而不知逆藩遠京師懷異心久又陰通  
貴人于朝而肆鴟張于其邸無問督撫監司大  
僚凡士釋褐選授或他所移任左遷一屬洪都  
輒攢睂往至則無不入其罟者非憤憤以爲不  
足介則心害其能試嘗之而結之而籠之而齧  
之甚有懼其毒者順則禍遲而大逆則禍陰而  
速蓋莫可誰何故遊者橋舌以畏塗戒也二南

先生弱冠知名以成化甲午貢于鄉後不第授  
倅南昌南昌故與邸屬歷弘治正德蒞任九載  
剛正廉明上下信服政聲赫然又長于孫吳之  
法捕巨寇威名益籍甚藩始欲致之先生爲修  
溫太真祠以見志藩好鶴有帶牌者適爲民家  
犬所斃藩虐其家且聞于先生先生判曰鶴雖  
帶牌犬不識字禽獸相殘于人何與縱之去藩  
憚先生嚴亦且止已而藩之嬖妃兄爲盜把風  
先生捕之急嬖妃中夜持泣藩不得已爲請者

再先生唯唯而卒置之法藩廼銜甚欲甘心于先生詐失火側室給先生救而害之及往止宮門大呼曰正殿災乎當親赴否直隸任耳遂不入亦竟不能害會考成遷貴之思南守幸以免迨藩擒而先生亦休矣嗚呼當先生以一下僚又名已見于時而木彊狼獾之側慮無不髮燎而几肉者乃獲以自保且孫許二公強項一呼慷慨殺身萬世參表而先生從容砥柱陰折邪心幾在虎口顧以獲全泯泯予每以脫禍幸先

生于生前而不能不以脫名惜先生于沒後時讀張氏誌乘于南昌事多隱語蓋時事未暇作傳文者猶咋舌焉予故表而傳之至其天性孝友宦績所在著名與其家系之詳語具載誌記中不爲贅

賦

中秋賞月賦

素昊司時蓐收行政日道西陸斗回西柄大火下於坤維虛宿中平離正掃赤煒之煩酷布金

行之清靜豆雨飽兮初歇梧風颯兮漸勁寒露  
零而金莖香灑氣浮而玉宇淨燕翩翩以東歸  
兮鴈嘹嘹而南競蟬咽聲以不鳴兮鷹奮迅而  
欲橫南呂之律始中西兌之治方盛係三五之  
良宵適平分之秋令暮烟霽而雲容四合潦水  
澄而天光遙映斯時也陰精揚彩坎象懸空西  
魄已載東魄未終望虛御兮駕冰輪於海東素  
娥舞兮調霓裳於曲中穆穆兮金波有影團團  
兮玉斧無功寒玉臂兮清輝皓皓濕雲鬢兮香

霧濛濛旣委照兮珠簾華屋亦容光兮瓮牖桑  
蓬普貞明而無私兮羌萬里之攸同人世總清  
虛之府皇都一葢珠之宮予於是盍朋簪開賓  
筵酌清醕調朱絃暢幽懷之廖廓邀勝賞於嬋  
娟歌坡翁之水調兮唱晁叟之洞仙脩歐陽之  
玩事兮賦希逸之佳篇喜美難之兼具樂風景  
之無邊已而銀河斜漢玉繩低纏爽籟發於林  
外天香散於庭前惜光陰兮易度愛良夜兮無  
眠群囂旣息衆音竝傳幾處樓臺絲管沸兮樂

歌舞於芳年誰家門巷砧杵急兮碎窮愁之萬  
千慨人間之憂樂感天上之缺圓徘徊俯仰不  
覺為之太息而凄然客有語予者曰賞心易負  
美景難留可人明月屬此清秋今夕之會也追  
玉堂之勝翫無天柱之遠遊據床笑傲兮若登  
武昌之樓詠詩諷誦兮如泛牛渚之舟騁高談  
之亶亶浩清興之悠悠人生有幾不樂何求子  
獨感慨而惆悵兮殆有類乎宋玉之窮戚而悲  
憂予乃喟然歎曰子豈知予者哉予竊怪夫少

年之偷閑兮寧能為時物而解顏吁嗟乎哲人  
之用心兮固將視一世以為悲歡月明明兮而  
無貴貧兮人情見月亦忻戚之多端有天涯兮  
遊子家山萬里兮疎問安今茲之夕兮望白雲  
而倚闌有遠地兮孤臣懷耿耿兮寸丹今茲之  
夕兮念瓊樓之高寒彼閭閻之饑饉兮十室九  
空擷草蕙以為梁對明月兮賦鴻鴈而自傷彼  
邊臣之將卒兮胡笳羌笛老征戍於沙場對明  
月兮指玉關為故鄉月照兮深閨有佳人兮忽

斷腸邊衣兮未寄盼良人兮天一方月照兮闌  
扉有縲囚兮悲夜長雉羅羅兮未脫刻木畫地  
兮那可忘富貴歡會兮貧苦憂思今夕之樂者  
幾何人兮而歎息愁怨者紛其若茲伊苦樂之  
相忘兮抑亦居之所移蹇予懷之鬱鬱兮良獨  
有感於斯志先憂而後樂兮謂希文其吾師彼  
風流之庾謝兮徒曠達其奚爲今

九重之仁聖兮憂元元之瘡痍恒宵旰以孜孜  
兮曾不暇乎樂漢武影娥之池顧書生之竊祿  
兮一升龠皆民脂愧無才以上佐天子而下吊  
蒼生兮其何心乎樂明月而娛嬉子以予爲悲  
秋之騷客兮其不淺之乎丈夫也耶嗚呼噫嘻  
客聞予言亦悚然而驚焦然而弗寧四顧聞然  
萬境俱清惟唧唧蟲聲洗盞更酌日色晶晶覺  
姮娥之有情



